

Date – 25/09/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. **Baptist English School Serkawn (BES) a school naupang te chu tlang hrilengin a man nasat avangin vawiin atangin ni 2 chhung zirna in an khar.**
2. **MIDH Special Intervention 2025-2026 hnuaiah Champhai District-a Grape kung upa tawh tuai thar leh tum a ni.**
3. **Union Finance Minister Nirmala Sitharaman-i chuan nimin khan New Delhi-ah Goods and Services Appellate Tribunal a hawng.**
4. **Union Cabinet chuan railway hnuaia thawk mi nuai 10 sing 9 leh sang 1 chuangte tan Productivity Linked Bonus PLB ni 78 avaiin cheng vaibelchhe 1865 pek a remti.**

<><><>

BES

Baptist English School Serkawn (BES) a school naupang te chu tlang hrilengin a man nasat avangin vawiin atangin ni 2 chhung chawlh an puang.

BES chuan thuchhuah siamin tunlai viral fever chuan an school a chiah hneh hle a. Kar hmasa atang khan school naupang damlo an pung chho zel a. Tunkar thawhtanni ni 22 khan zirlai 325 chu damlohna avangin an kal thei lova, thawhlehi ni 23 khan zirlai 445 an kallo leh a. Nimina-ah zirlai 528 students an kal lo leh a ni. Zirtirtu kal theilo leh nuamsamlo engemaw zat an awm bawk.

Naupang kallo an tam avangin class test hun pawh sawnhlat a ni a. Neltas Exam tur pawh tawlh hlat zel rih a ni a, Doctor-te thurawn angin vawiin leh zirtawpni chu chawlhah an puang a ni.

<><><>

CM

Ministry of DoNER hnuaia High Level Task Force on Handloom & Handicraft, Pu Neiphiu Rio, Nagaland Chief Minister kaihhruaina hnuaia dinte chu online hmangin nimin khan an thukhawm leh a. Member a nih angin Chief Minister Pu Lalduhoma pawhin a office atangin a lo zawm a. Chief Secretary Pu Khilli Ram Meena, Commissioner & Secretary to CM Pu Vanlaldina Fanai, Pu H. Lianzela, Director, Commerce & Industries ten an tawiawm.

Chief Minister chuan, meeting hmasaa an sawite bawhzuiin Mizoramah Handloom & Handicraft kalpui theihna hmunte an thlang fel tawh, a ti a. Hmarchhak bial huapa hmasawna tur rawtna pali; Cluster base-a hmarchhak

huapa kal thu te, E-commerce tangkai zawka hman te, ram pawna thawhchhuah lama hmalatu tur din leh Handloom & Handicraft lama Inter-State leh Centre thawhhona council chak tak din te an ni. Rawtnate an sawiho nghal a, hmalak zel dan tur an duang bawk.

Ministry of DoNER hnuaiah hian hmarchhak bial huap hmasawnna hna kalpui dan tur road map duangtu High Level Task Force hrang hrang din a ni a. Heng Task Force te hian meeting neiin hmalakna tur an duang mek a ni. Report an peih hunah DoNER ah hian an thehlut ang a, a taka bawhzui dan an dap zui ang.

<><><>

CHAMPHAI GRAPE

Champhai Tlangsam a Grape Winery hmunah Mission for Integrated Development of Horticulture (MIDH) Special Intervention 2025-2026 hnuaiah Champhai District-a Grape kung upa tawh tuai thar lehna Horticulture Secretary, Pi Maria CT Zuali hovin B. Remmawia Packing Hall, Champhai Winery Tlangsamah khuhhawnna neih a ni a,

Horticulture Secretary Pi Maria CT Zuali chuan Sorkarin Grape tuai thar leh nan tanpuina a pek te chu tangkai taka hmanga an Grape chinah inpumpekna nen thawka hlawk taka thar turin duhsakna a hlan a ni. Horticulture Secretary hian MIDH hnuaia hamthatna hrang hrang a sem nghal bawk a ni.

MIDH Special Intervention 2025-2026 hmang hian Grape upa tawh tuai thar lehna turin Horticulture Department chuan Grape chingtute hnenah leitha (Neem Cake) kg 75, leichi (NPK 20:20:20) kg 30, tui pip) roll khat, rannung thahna , a natna enkawlna damdawi (Blue Bordo) Kg 4, a kahna leh a tang tanna cheng singkhat sangli zasarih sawmsarih man hu Grape chingtu mi 360 hnenah unit khat theuh a thlawnin an pe a ni. Champhaiah hian Grape chingtu mi 277 awmin Hnahlanah mi 83 an awm a ni.

<><><>

GST REFORMS

Sorkar laipuiin GST rate thara mi harsa zawk ten an lei theih tur chhiah a ti hniam a, mihring hriselna atana tha lo, vaihhlo leh zu kaihnawih atanga chhiah lak zat a ti pung chu tha an tih thu mithiamten an sawi.

Akashvani Aizawl zawhna chhangin Pu Hrangtawna IRTS (Rtd) chuan sorkar laipuiin GST a ennawn chu tha a tih thu sawiin, tunhmaa GST rate a san avangin mipuite chhiah an chawi tam thin lutuk a ti a, nitina mipui mamawh bakah damlo harsa zawk te tana damdawi pawimawh, life-saving drugs ah te chhiah lak a ni tawh lo chu tha a ti hle tih sawiin, vaihhlo leh a kaihnawih bakah zu atanga chhiah lak zat chu zaa 40-ah tihpun a ni a, mi rethei leh mi harsa zawkin an lei ve theih car tenau leh two-wheeler atanga chhiah lak zat tihniam a, car manto leh changkang zawkahte chhiah a tisang chu tha a ti hle a, ram tan pawh tha hlea a hriat thu a sawi a ni.

Pu Hrangtawna chuan tunhnaia sorkar laipuiin GST a ennawn thut chu US-in chhiah chungchanga India a nawr nasat lutuk vang nia a hriat thu a sawi a, India chuan kum 2047-ah chuan khawvela economy chak ber nih tuma a beihna kalzelah Prime Minister Narendra Modi pawhin chhiah lak dan chu One Nation, One Tax tih sawiin, state tinah ang khat veka chhiah la turin a ti a, hei hi Mizorama sumdawngte leh thil leitu mipuite pawh tha taka kalpui turin a chah a ni.

<><><>

BJP LUNGLEI PRESS CONF

Lunglei Dist BJP President Pi R.Lalbiaktluangi chuan BCM enkawl, Arunachal Pradesh Roing-a Mt.Carmel Sikul-a buaina chhuak chungchangah Warden Lalnunpuia Lunglei Zotlang, Police Custody a awm mek chu theihtawp chhuah a chhhanchhuah an tum tih a sawi a, Kohhran zai ngai tak in hma an la mek a ti.

He thu hi nimin khan Lunglei Press Club-a thuthar lakhawmtu te hmaah puangin Pi R. Lalbiaktluangi chuan Mt.Carmel School-ah hian kumin July ni 9 khan misual pakhat School Hostel-ah lut in hmeichhe zirlai a khuaikhem ni a hriat a ni a, Police te pawhin he pa hi an man a, mahse zirlai nu leh pa, khawtual miten Police Thanna luhchilh in hepa hi an hnukchhuak a, an sawisa hlum a ni. Hetiang anih avang hian Missionary, Pu Lalnunpuia, Hostel warden chu Police ten man ve lehin POCSO Case in thubuai an ziak lut ta daih a, karleh Thawhtanni ni 29 khian Chargesheet an siam tawh mai dawn ni a hriat a ni a, chuvang chuan Missionary chhanchhuak tur hian hma an la tih a sawi.

Dist BJP President chuan he buaina chungchangah hian Mizoram a Kohhran member thenkkhat ten BJP leh RSS thil tih angah te puhin Kohhran zing tawngtai inkhawmah te thawh in BJP dem zawng in awka an chhuah a, hei hi thudiklo a ni a ti a. Tunah hian Party anga an inrawlhna chhan chu Mizo Missionary in harsatna a tawh a, National Party an nih avangin leh Arunachal Pradesh-ah pawh an party Sorkar-na anih vang te leh Central-ah an sorkar lai anih vanga thahnemngaihna a hmala an ni tih a sawi a, Mizo te leh Christian te thlavang hauh a ngaihna ah emaw tih theih ve an nei anih chuan theihtawp a hmalak ve zel chu an tum a ni a ti.

<><><>

KHAWBUNG SWASTH NARI

Khawbung PHC-ah Swasth Nari Sashakt Parivaar Abhiyaan pualin Health Kiosks - TB Screening leh AYUSH Health Camp neih a ni.

TB test nan hian hi 10S screening method hman a ni a, mipa 18 leh hmeichhia 27 test niin mi 9 sputum la tura hrilh an ni. AYUSH Health Camp-ah hian damlo 105 en an ni a, damdawi a thlawna pek an ni bawh.

Swasth Nari, Sashakt Parivar Abhiyaan hi Ministry of Health and Family Welfare (MoHFW) leh Ministry of Women and Child Development (MoWCD) tangkawp hmalakna a ni a, hmeichhia leh naupang hriselna puihna atana India rama hmalakna lian ber a ni a, Champhai Ditriect ah pawh tun thla ber ni 17

atanga October ni 2, 2025 chhungin Champhai District huam chhung khaw hrang hranga District Hospital, Community Health Centre, Primary Health Centre, Urban Primary Health Centre leh Health and Wellness Centre-ah te hmeichhiate hriselna endikna kalpui a ni dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KOLASIB

Kolasib ah District Legal Services Authority (DLSA) leh District Programme Officer, Women & Child Development, Kolasib tangkawp buatsaih in kumtinglo inneih khapna-Prohibition of Child Marriage Act, 2006 chungchangah training nimin khan neih a ni a.

He hun ah hian CDPO Thingdawl Pu Vanlalzapa chuan Naupang kum tlinglo nupui pasal a inneih a pawl theih zia leh mipui vantlangah inzirtirna tam zawk neih a pawimawh thu a sawi.

He hunah hian Kolasib District Court a CJM Pu Zonunmawia chuan Prohibition of Child Marriage Act, 2006 thupui hmangin kalkhawmte a zirtir a, training ah hian Thingdawl ICDS Project hnuaia Village Council Secretary te kokhawm in, an tel ani. VC Secretary te hi an khua theuh ah Child Marriage Prohibition Officer atana ruat an nih avangin he training ah hian an tel vek a ni.

<><><>

UNION CABINET

Union Cabinet chuan railway hnuaia thawk mi nuai 10 sing 9 leh sang 1 chuangte tan Productivity Linked Bonus PLB ni 78 avaiin cheng vaibelchhe 1865 pek a remti.Nimina Union Cabinet thukhawm chuan he thutlukna hi siamin ramchhunga lawng siamna hmunpui leh a kaihnawih eizawna ti nung thar turin package cheng vaibelchhe sing 6 sang 9 leh 725 a pawm bawk a.

New Delhi-a chanchinbumite kawmin Union Information and Broadcasting Minister Ashwini Vaishnaw chuan he package hi lungphum pali ah a innghat a ti a. Pu Vaishnaw chuan ramchhunga lawng siamna hmunpuite tanpui a, National Shipbuilding Mission hmanga an hmasawna vil an tum thu a sawi bawk a ni.

<><><>

GST APELLATE TRIBUNAL

Union Finance Minister Nirmala Sitharaman-i chuan nimin khan New Delhi-ah Goods and Services Appellate Tribunal a hawng.Thusawiin Pi Sitharaman-i chuan chhiah petu mipuite tana rorelna dik tak pekna tur hmun

anih thu sawiin sumdawnnaa inrintawwna tuhtu tur a ni a ti a. India eibar hmasawn mek nawr chak lehzualtu a ni ang tih a sawi bawk.

<><><>

MAOIST

Chhatisgarh-a Dantewada district-ah Maoist hel 71 sawrkar kutah an inpe. Police te sawidanin hel inpe zinga mi 31 te hi an luman belhkhawm hi cheng nuai 64 lai a ni a. State sawrkar chuan hel inpete intunnunna tur cheng sing nga theuh a pe dawn a. Hei bakah hian hmanrua leh thiamthil tihhmasawwna lam pawh pek an ni ang.

<><><>

SEVA PARV

Mipui rawngbawl leh sawrkar inrelbawlna tha thupaia neiin Prime Minister Narendra Modia hnuaiah ramchhungah hmasawwna tam tak thlen mek a ni. Tun tum Seva Parv hunah chuan ralthuam tihhmasawwna kawnga sawrkar hmalakna tarlang ila. PM Modia sawrkar chuan kum 11 kalta chhungin defence lamah ngaihtuahna thar sengin hmasawwna tam tak a thlen a. Innovation of Defence Excellence,iDEX chu kum 2018 April thla khan hawn niin defence lama ngaihtuahna thar hman kawngah inelna tha siam a ni a. PM Modia chaun hawwna thu sawiin sawrkarin technology, innovation leh zirbingna leh tihhmasawwna a ngai pawimawh hle tih a sawi.

<><><>